

Բ Ա Ն Ա Վ Ե Ճ Д И С К У С С И Я

ՀԱՅՈՑ ԹԱԳԱՎՈՐՈՒԹՅԱՆ ՎԵՐԱԿԱՆԳՆԵՄԱՆ ՀԱՐՑԸ ՎԱՐԴԱՆԱՆՑ ՊԱՏԵՐԱԶՄԻ ԺԱՄԱՆԱԿ

ՀՍՍՀ ԳԱ քղաքից առդամ Վ. Ս. ՆԱԻԲԱՆԴՅԱՆ

Բնական է այն մեծ հետաքրքրությունը, որ հայագիտությունը հանդես է բերել և շարունակում է հանդես բերել հայ ազատագրական շարժումների ներկատմամբ՝ լինի դա հեռավոր անցյալի, թե նոր ու նորագույն շրջանի: Եվ դա միանգամայն հասկանալի է, երբ նկատի ենք ունենում, որ ազատագրական մաքառումը (իր տարբեր դրսևորումներով) եղել է մեր ժողովրդի պատմության մշտական ուղեկիցը՝ սկսած հնագույն ժամանակներից ընդհուպ մինչև մեր օրերը:

Անվիճելի իրողություն է, և դա հաստատել են պատմությունն ու ժամանակը, որ հայ ժողովրդի բազմադարյան ազատագրական պայքարի ամենափայլուն դրվագներից մեկը սասանյան Պարսկաստանի տիրապետության ու բռնի ներձուլման քաղաքականության դեմ ուղղված 451 թ. հուժկու ապստամբությունն է, որ ի պատիվ նրա քաջարի առաջնորդի և յուր հավատարիմ զինակիցների Վարդանանց պատերազմ անունն է կրում: Վարդանանց ապստամբությունն, իրոք, վիթխարի ազդեցություն է ունեցել հետագա դարերի ողջ հայոց պատմության վրա՝ ժողովրդի պատմական հիշողության մեջ ակոսվելով՝ որպես ազատագրական մեծ ոգորումների, ազգային պատվի ու արժանապատվության պաշտպանության, ժողովրդի իսկ գոյության, նրա ինքնության պահպանման համար մղվող պայքարի մի անկրկնելի խորհրդանշան՝ դարեր շարունակ ոգեշնչելով հայ քաջորդիների բազում սերունդներ, նրանց մղելով հայրենասիրական-ազատագրական նոր սխրանքների: Եվ սա անհնդմեջ, մեր ժողովրդի պատմության բոլոր դարերում: Հասկանալի է, ուրեմն, թե ինչու հայոց պատմության այդ նշանավոր իրադարձությունը V դարից, Եղիշի ոսկեդենիկ մատյանից սկսած այնպիսի տեական ու լայն արձագանք է գտել ազգային պատմագրության, գեղարվեստական գրականության մեջ, արվեստի ու ժողովրդական բանահյուսության ստեղծագործություններում: Վարդանանց պատերազմի թեմաներով կերտվել են գրական ամենատարբեր ժանրերի (բանաստեղծություն, պոեմ, դրամա, վեպ, վկայաբանություն, շարական և այլն) անհամար քերթվածներ, գեղանկարչական ու քանդակագործական արվեստի բազմաթիվ սքանչելի ստեղծագործություններ, ժողովրդական գեղեցիկ ավանդություններ:

Մեծ ու արդյունաշատ աշխատանք է կատարված հայ ժողովրդի պատմության այդ նշանավոր դրվագի պատմաքննական հետազոտման մարզում, որի շնորհիվ Վարդանանց պատերազմի հետ կապված բազմաթիվ կարևոր հարցեր ստացել են իրենց վերջնական լուծումը, բայց հարցեր էլ կան, որ դեռևս պարզաբանման կարիք ունեն և այսօր էլ զբաղեցնում են հետազոտողներին: Այս առումով հետաքրքրական է, անշուշտ, պատմական գիտությունների դոկտոր Վ. Ն. Յուզբաշյանի՝ վերջերս հրապարակած «Հայ-վրացական ապստամբությունը սասանյան իշխանության դեմ (482—484 թթ.)» հոդվածը¹, որ հեղինակը V դարի ազատագրական մեծ մաքառումի և հատկապես՝ դարի երկրորդ խո-

¹ Տե՛ս «Պատմա-բանասիրական հանդես», 1985, № 1, էջ 47—63:

շոր ազատագրական կռվի՝ Վահանանց պատմամթերքային կապակցությամբ արժարժու է նաև Վարդանանց պատերազմի հետ կապված որոշ հարցեր, փորձում նոր լուսաբանություն տալ մի քանի հայտնի փաստերի, որոնք իրոք ուշագրավ են, բայց ոչ միշտ անվիճելի²։ Դրվատելի է, անշուշտ, պատմական հայտնի փաստերի ու պատմագիտական եզրահանգումների նկատմամբ հեղինակի քննական մոտեցումը, և հազիվ թե մասնագետ պատմաբաններն անտարբեր անցնեն հետազոտողի հարցադրումների կողքով։ Դրա հետ մեկտեղ, սակայն, հեղինակն առաջադրում է եզրահանգումներ, որոնք լուրջ տարակուսանքի տեղիք են տալիս։

Հեղինակի շոշափած խնդիրներից այստեղ մեղ հետաքրքրում է միայն մեկը՝ Վարդանանց պատերազմի նախօրեին և պատերազմի ընթացքում Հայոց թագավորության վերականգնման խնդիրը, որ, ինքնին հասկանալի է, ժամանակին լրիվ բնույթ չի ունեցել, այլ վերաբերել է ազատագրական այդ մեծ կռվի գլխավոր նպատակին, նրա բուն էությունը։ Հենց սկզբից ասենք, որ հետազոտողի դիրքորոշումն այս առթիվ անընդունելի է։

Նախքան հարցի բուն քննությանն անցնելը, տեսնենք, թե ո՞րն է հեղինակի հիմնական ելակետը։ Նա գրում է. «Մեծ Հայքի բաժանումը Պարսկաստանի ու Բյուզանդական կայսրության միջև (387 թ.) և Արշակունյաց հարստության վերացումը հայոց աշխարհի արևելյան հատվածում (428 թ.) դիտվել են և շարունակում են դիտվել որպես շրջադարձային երևույթներ. կորցնելով սեփական պետականությունը, Հայաստանը ոտք է դնում մի բոլորովին նոր դարաշրջան։ Արդյո՞ք արդարացիված է այդպիսի ժայռահեղ տեսակետը³։ Ակնհերե է, որ նման հարցադրումը ինքնին ենթադրում է հարցի բացասական պատասխանը։ Հետազոտողի մոտեցման հիմքը երևում է մեղ բերված տողերի անմիջական շարունակությունից, ուր ասված է. «Ինչ խոսք, և՛ 387 թ., և՛ 428 թ. խորհրդանշում են հայոց պատմության մի նոր շրջանի սկիզբ։ Սակայն ղրկվելով սեփական թագավորական իշխանությունից, հայերը կարողացան պահպանել նախկին պետական կառուցվածքի մի շարք կարևոր հաստատություններ և դրանով ապահովեցին լայն չափերի հասնող ինքնավարություն⁴։ Ահա այն մեկնակետը, որ հեղինակին հիմք է տվել ըստ էության կասկածի տակ առնելու, «Ժայռահեղ տեսակետ» հայտարարելու երկու աշխարհակալ տերությունների՝ Պարսկաստանի ու Արևելյան հռոմեական կայսրության միջև Մեծ Հայքի բաժանվելը, օտարի դերիշխանության տակ ընկնելն ու սեփական թագավորական իշխանության՝ Արշակունյաց հարստության վերացումը «շրջադարձային երևույթներ» համարելու միանգամայն հիմնավոր տեսակետը։ Կարծում ենք, որ ակնհայտ է այստեղ հետազոտողի վրիպումը։ Որքան էլ կարևորություն տրվի, մեծ նշանակություն վերագրվի նախկին պետական կառուցվածքի մի շարք կարևոր հաստատություններ» պահպանելու միջոցով հայերի լայն չափերի հասնող ինքնավարություն» (որը, ի դեպ, ինչպես կտեսնենք, Արշակունյաց հարստության վերացումից հետո շատ կարճ կյանք ունեցավ, ընդամենը շուրջ երկու տասնամյակ տևեց), միևնույն է, և՛ 387 թ., և՛ 428 թ. հայերի համար եղան իրոք «շրջադարձային երևույթներ» (և ոչ թե սոսկ «խորհրդանշում են հայոց պատմության մի նոր դարաշրջանի սկիզբ», ինչպես անորոշ կերպով, խնդիրը անտեղի մեղմացնելով կարծում է Կ. Յուզբաշյանը), որոնք բազում նոր դժբախտությունների դուռ հանդիսացան, ուրբերգական հետևանքներ ունեցան հայ ժողովրդի ֆաղափական ճակատագրի առումով, նրա պատմական հետանկարի տեսակետից։ Այս արդեն անվիճելի

² Արժեքավոր է նաև Կ. Ն. Յուզբաշյանի՝ մինչ այդ տպագրած «Ծրբ է սկսվել Վահան Մամիկոնյանի գլխավորած ապստամբությունը» հոդվածը («Պատմա-քաղաքական հանդես», 1984, № 1), ուր մատենագրական աղբյուրների որոշ տվյալների նոր մեկնաբանությամբ հեղինակին հաջողվել է ճշտել այդ կարևոր իրադարձության սկզբնավորման տարեթիվը։

³ «Պատմա-քաղաքական հանդես», 1985, № 1, էջ 47 (ընդգծումը մերն է — Վ. Ն.)։

⁴ Նույն տեղում։

նշմարտություն է և շատ լավ հետազոտված է հայ պատմական գիտության մեջ, ուստի և հայտնի փաստերն ու պատմագիտական հիմնավոր եզրահանգումներն այստեղ երկրորդելու անհրաժեշտություն չկա: Միայն ավելորդ չէր լինի, թե-
րևս, 387 թ. կապակցությամբ հեղինակին հիշեցնել Փավստոսի խոսքերը. «...նուազեցաւ բաժանեցաւ ցրուեցաւ թագաւորութիւնն Հայոց, պակասեաց յիւրմէ մեծութենէն յայն ժամանակ և յապայ»⁵, իսկ 428 թ. առթիվ մատնանիշ անել Մովսէս Խորենացու «Հայոց պատմության» վերջին հատվածը՝ «Ողբք վասն բառնալոյ թագաւորութեանն Հայոց յազգէն Արշակունեաց և Զպիսկոպոսապետութեանն յազգէ սրբոյն Գրիգորի»: Այնպես որ XX դարի հեռվից, առանց թյուրիմացությունների մեջ ընկնելու, ըստ երևույթին այնքան էլ դյու-
րին չէ պատմական անխախտ ճշմարտությունների վերանայումը:

Այժմ անցնենք մեզ հետաքրքրող հարցի քննությանը՝ ըստ էության:

Կ. Յուզբաշյանը զարգացնում է այն թեզը, որ «...չնայած Հայաստանը գտնվել է պարսից շահնշահի գերիշխանության ներքո, երկրում տիրել է որոշ հավասարակշռություն, և հենց այդ վիճակն էին ձգտում ապահովել հայերը: Պոռթկումն առաջանում էր այն դեպքում, երբ այդ հավասարակշռությունը խախտվում էր»⁶: Իր այս մտքին հեղինակը կցել է հետևյալ ծանոթությունը. «Այն տեսակետը, թե իբր V դարում Հայաստանում սեփական թագավորությունը վերականգնելու փորձեր են եղել, թվում է մերժելի: Եղիշի տվյալները հիմք չեն տալիս նման եզրակացության, իսկ ուշ շրջանի հեղինակների պատմածը առասպելական բնույթ է կրում. հակառակ կարծիքը տե՛ս В. С. Нал-
баидян. Египет. Ереван, 1972, с. 153—162»⁷:

Նկատենք, ի դեպ, որ թեև այստեղ հետազոտողը հղում է 1972-ին լույս տեսած մեր «Египет» մենագրությանը, բայց խնդրո առարկա հարցին մենք նվիրել ենք դրանից շուրջ երկու տասնամյակ առաջ հրապարակած՝ «451 թ. ազատագրական շարժման հետ կապված մի հարցի շուրջը» հոդվածը⁸: Քըն-նարկվող հարցին սերտորեն առնչվում է դրանից երկու տարի ավելի վաղ հրապարակված մեր մեկ այլ՝ «Հայերի կողմից պարսկական տիրապետության դեմ ուղղված 451 թվի ապստամբության սոցիալ-քաղաքական պատճառների հար-
ցի շուրջ» հոդվածը⁹:

Սույն հոդվածում մենք ստիպված ենք հիմնականում կրկնելու տարիներ առաջ մեր ասածը, երկրորդելու մատենագրական աղբյուրների՝ մեր օգտա-
գործած տվյալներն ու դրանց քննության արդյունքները, միաժամանակ բերելով որոշ նոր փաստեր, անելով անհրաժեշտ հավելումներ:

Ամենից առաջ օրիգինալ մի հարց է ծագում. պարսից դաժան տիրապետու-
թյան, օտարի սոցիալ-քաղաքական ծանր լծի ու կրոնական անագորոյն հա-
լածանքների դեմ ժողովրդի համընդհանուր դժգոհության, հայ հասարակության բոլոր խավերի, ողջ ժողովրդի ուղղափառ քաղաքական բուռն ակտիվության, հայ-
րենասիրական բացառիկ ոգորումների մի այնպիսի իրադրության պայմանե-
րում, որպիսին եղել է Ավարայրի նախորդող շրջանը և ինքը՝ Ավարայրի հե-
րոսամարտը, կարո՞ղ էր կյանքի չկոչվել դրանից ընդամենը երկու տասնամ-
յակ առաջ կործանված սեփական թագավորությունը (թո՞ղ որ այն լինի կիս-
անկախ), հայ պետականությունը վերականգնելու գաղափարը: Պատմական
տրամաբանությունն ինքնին թելադրում է հարցի դրական պատասխան: Եվ

⁷ Փավստոսի Բիզանդացույ Պատմութիւն Հայոց. Թիֆլիս, 1912, էջ 393—394:

⁸ «Պատմա-բանասիրական հանդես», 1985, № 1, էջ 48 (ընդգծումը մերն է—Վ. Ն.):

⁹ Նույն տեղում, ծան. 3:

¹⁰ Տե՛ս ՆՍՍՏ ԳԱ «Տեղեկագիր» (հաս. գիտ.), № 12, էջ 69—73: Հոդվածի առաջին պարբե-
րություն մեջ սպրդել է մի վրիպակ. «Տիգրանի» փոխարեն տպված է «Նվարա»-ն:

¹¹ Տե՛ս նույն տեղում, 1951, № 10, էջ 91—115: Հիշյալ հոդվածները, խմբագրական շտա-
կումներով մտել են մեր «Վարդանանց պատերազմը և Գ. Դեմիրճյանի «Վարդանանց» պատմա-
վեպը» մենագրության (Երևան, 1955), նույն աշխատության ուսուցչին հրատարակության (Երե-
վան, 1956), ինչպես նաև հոդվածագրի հղած «Египет» մենագրության մեջ:

ապա. դիցուք, թե հայերն Ավարայրում կատարյալ հաղթանակի հասան. այդ պարագայում Հայաստանում ի՞նչ պետական կարգ պիտի ստեղծվեր, հասարակապետություն պիտի ծնվեր (ինչպես լրջորեն կարծել է լեոն իր «Վարդանանք» պատմական դրամայում), թե՞ հաղթանակ նվաճած հայերը պարտված պարսիկներից ծնկաչոք պիտի աղերսեին վերադարձնել իրենց նախկին կիսանկախ վիճակը...

Այս՝ ի միջի այլոց:

Այժմ անդրադառնանք փաստերին, տեսնենք, թե քննության առարկա հարցի առթիվ ի՞նչ վկայություններ են պահպանել պատմական աղբյուրները և որքանով իրավացի է հետազոտողը «ուշ շրջանի հեղինակների պատմածը» «առասպելական» հայտարարելով՝ առանց որևէ ապացույց բերելու:

Իրավ է, մեզ հետաքրքրող հարցի առթիվ պատմական տվյալները վերաբերում են ուշ դարերին, բայց, ինչպես կտեսնենք, այս հանգամանքը բնավ չի ստվերում նրանց պատմական հավաստիությունը: Իսկ թե ինչու Նղիշեի երկում ուղղակի վկայություններ չկան հայոց թագավորությունը վերականգնելու փաստի առթիվ՝ այդ մասին խոսք կլինի իր տեղում:

Պատմական աղբյուրները հիմք են տալիս պնդելու, որ Վարդանանց պատերազմի նախօրեին ու պատերազմի ընթացքում, իրոք, հայ հասարակության վերնախավի շրջանում ոչ միայն լրջորեն խմորվել է հայկական թագավորությունը, ինքնուրույն պետականությունը վերականգնելու գաղափարը, այլև այդ գաղափարի իրականացման ուղղությամբ գործնական լուրջ քայլեր են արվել:

Այսպես, անդրադառնալով Ավարայրի ճակատամարտին նախորդող իրադարձություններին, Թովմա Արծրունին (IX—X դդ.) վկայում է. «Եւ քանդեն, աւերեն զմեհնանն և յատակեալ զտեղին՝ շինեն նորին քարամբք զմեծ եկեղեցին զսուրբ Գրիգորն ի Բլուր տեղուոյն, և փոխեն անդ զկաթողիկոսն Հայոց զԴիւտ. և շինեն նախարարն Հայոց իւրաքանչիւր պալատս արքունականս և դաստակերտս յականաւորս, և քաղաքն (խոսքը Դիլինի մասին է—Վ. Ն.) որմափակօք պարսպն, և խաղաղեցուցանեն զերկիրս: Իսկ զթագաւորաբնակ տեղին մեծին Տրդատայ տան ի ձեռս Վահագայ Արծրունեայ՝ շինել նմա տուն թագաւորաց... քանզի խորհեցան թագաւորեցուցանել զնա ի վերայ Հայոց, զի էր այր սրտեայ և ուժեղ, քաջախորհուրդ և իմաստնախորհ, խոնարհ, առատաձեռն և զուարթամիտ: Բայց յետոյ անմիաբան գտեալք նախաւորքն Հայոց՝ թողին զոր խորհեցանքն վասն թագաւորելոյ Վահագայ, և անցին գնացին առ մեծն Վարդան. զնաց և Վահան զհետ նախարարացն առ Վարդան առաջագոյն, տալ նմա զվերակացութիւն Հայոց. և եղեն ճեղքանդեալ նմա զամենայն աւուրս Վարդանայ»¹⁰. Ցավոք, պատմիչը խոսքը չի մանրամասնում, ոչինչ չի հաղորդում Վահան Արծրունուն թագավորեցնելու հարցում հայ նախարարների անմիաբանության պատճառների, ինչպես նաև Մամիկոնյան տան նահապետին նախապատվություն տալու հանգամանքների մասին: Բոլոր դեպքերում, սակայն, Մահակ Պարթևի թոռան, Մամիկոնյան ազգեցիկ նախարարական տան նահապետի, հայոց զորքերի քաջարի սպարապետի նկատմամբ նախարարների նման վերաբերմունքը միանգամայն բնական պիտի համարել:

Կարծում ենք, որ Թովմայի վկայության հավաստիությունը կասկածի տակ առնելու (առավել ևս՝ այն «առասպելական» համարելու) հիմքեր չկան, երբ մանավանդ նկատի ենք ունենում, որ վկայողը Արծրունյաց նախարարական տան տոհմային պատմիչն է, և որպես այդպիսին, ինչպես հայտնի է, մեր հին պատմիչներից ամենակողմնակալներից մեկը թերևս, որ ամեն առիթով բարձրացնում է Արծրունիներին՝ ետ մղելով մյուս նախարարական տոհմերի ներկայա-

¹⁰ Թովմայի Վարդապետի Արծրունեայ Պատմութիւն տանն Արծրունեաց. ի լոյս էած Ք<երորէ> Պ<ատկանեան>. Ս. Պետերբուրգ, 1887, էջ 78—79: Ժամանակին լեոն Նշել է այս փաստը, բայց ըստ երևութիւն առանձին արժեք չտալով դրան, քննարկման առարկա չի դարձրել: Տե՛ս նրա Հայոց պատմութիւն. հ. 2, Երևան, 1947, էջ 47:

ցուցիչներին: Դեռևս 1953 թ. հրապարակած մեր հոդվածում¹¹ մենք նշել էինք, որ ԼՅԼ Թովման իր ձեռքի տակ շունենար հին դարերից եկող որևէ գրավոր աղբյուր, հազիվ թե հորիներ մի պատմություն, ուր բացահայտորեն նսեմանում է Արծրունյաց տոհմի տանուտերը և նախապատվությունը տրվում Արծրունիների վաղեմի մրցակից Մամիկոնյանին: Մեր այս կարծիքին ժամանակին համամիտ է եղել հայ ազատագրական շարժումների հմուտ հետազոտող, ՀՍՍՀ ԳԱ ակադեմիկոս Աշոտ Հովհաննիսյանը: «Հինգերորդ դարից մեծ հասած աղբյուրների մեջ,— գրում է նա,— Թովմայի հաղորդածը հավաստող այլ վկայություններ չկան: Կարող էր կասկած լինել, թե Թովման հնարում էր այս պատմությունը՝ Արծրունյաց նահապետին մեծարած լինելու համար: Սակայն, ինչպես ճիշտ դիտում է Նալբանդյանը, Վահանին թագավոր կարգելու մասին նրա պատմածը չէր փայփայում Արծրունյաց տան ինքնասիրությունը. Արծրունյաց նախարարն իսկ խոնարհվում էր Մամիկոնյան տան պետի հեղինակության առաջ: Այ. Հովհաննիսյանը ևս կարծում է, որ «իր նկարագրած շեպքի համար Թովման օգտվել էր, ըստ երևույթին, մեր ձեռքը չհասած հին մի աղբյուրից»: Հետազոտողի կարծիքով «Դարի հանրածանոթ աղբյուրներից զատ, նրա տրամադրության տակ կար «Հայոց մնացորդաց պատմություն» կամ, ինչպես գրում էր Թովման, «Մնացորդք պատմագրացն առաջնոց» գիրքը, ուր զետեղված էին Մասբեր Վերծանողի, նրա Մովսես եղբոր (որին ումանք, թվում է թե սխալաբար, նույնացնում են խորենացու հետ) և Թևոդորոս Քերթողի պատմական գրքվածքները: ...Մի այլ տեղ, խոսելով Վարդան Մամիկոնյանի և Վահան Արծրունու նահատակության մասին, Թովման նշում էր, որ իր նկարագրած մանրամասնություններն առել է Աբրահամ խոստովանողի համառոտ պատմությունից»¹²:

Մեզ վերադեցնող հարցի առթիվ շատ ուշագրավ է նաև մեկ այլ աղբյուր՝ Մեսրոպ Հայոցձորցու (X դար) «Պատմություն սրբոյն Ներսէսի Հայոց Հայրապետի» երկի հիշատակարանը, ավելի ստույգ՝ այդ հիշատակարանի ձեռագիր ընդօրինակությունները¹³: Վայոցձորցու երկի 1297 թ. ձեռագրի հիշատակարանում կարդում ենք. «...Վարդան Մամիկոնեան բռնացեալ ունէր զտեղի թագաւորացն Հայոց... և արիաբար ընդդիմամարտեալ քաջութեամբ իւր պատերազմացն պարսկական զւարացն, որ դիմէին ի վերայ նորա. և յաղթեալ նոցա քաջն Վարդան դարձուցանէր զնոսա և յաղթահարէր զնոսա վերին աւգնականութեամբ և զաւրութեամբ սուրբ խաչին: Սւ յետ բազում յաղթութեան նահատակեալ առնոյր մարտիրոսական պսակն յաւուրս ֆազկերտի պարսից արքայից արքայի»: «...Արդ այս համառաւտ ասացաւ. զայլսն ամենայն ի սուրբ Վարդանանց գրոցն գտցես զբաւականդ»¹⁴, որով հեղինակը հղում է Եղիշեի մատյանը: Նույն տեղեկությունը տե՛ս նաև Վայոցձորցու «Պատմություն սրբոյն Ներսէսի Հայոց Հայրապետի» երկի 1441 թ. ձեռագիր ընդօրինակության հիշատակարանում¹⁵:

Մեսրոպ Վայոցձորցու վկայությունը այն մասին, թե Վարդան Մամիկոնյանը «բռնացեալ ունէր զտեղի թագաւորացն Հայոց» պարզ մատնանիշ է անում, որ նա տիրակալություն է արել Արշակունյաց թագավորների ոստանին: Այս տեղեկության հավաստիությունը ևս կասկածի տակ առնելու հիմքեր չկան, մանավանդ երբ նկատի ենք ունենում Վայոցձորցու «Պատմության» բնույթը: «Պատմություն սրբոյն Ներսէսի Հայոց Հայրապետի» երկը սոսկ քաղաքու-

¹¹ Տե՛ս ՀՍՍՌ ԳԱ «Տեղեկագիր» (հաս. գիտ.), 1953, № 12, էջ 70:

¹² Աշոտ Հովհաննիսյան. Դրվագներ հայ ազատագրական մտքի պատմության. գիրք առաջին, Երևան, 1957, էջ 97—98:

¹³ Մեսրոպ Վայոցձորցու «Պատմություն» զետեղված է «Սոփերք հայկականքի» Զ հատորիկում, բայց հիշատակարանը տպագրված է կրճատով. այնտեղ բացակայում են մեզ հետաքրքրող տեղեկությունները:

¹⁴ Մաշտոցի անվ. Մատենադարան, ձեռ. № 5980, էջ 121ա-ր:

¹⁵ Նույն տեղում, ձեռ. № 1665, էջ 102ա:

թիւն է, որի մասին վկայում է ինքը հեղինակը՝ իր երկի հիշատակարանում գրելով. «Ի նժԶ (967) թուականիս Հայոց... ես Մեսրոպայ նուաստ քահանայի վայոց ձորոյ ի գեղջէ Հողոցմանց... մեծ ցանկութեամբ ծաղկափաղ աւարի զգիրս գայս ի Հայոց մնացորդաց յԱրեւելից գրոց. զյաղթութիւն և զվատթարութիւն թագաւորացն Հայոց և Վրաց, և զառաքինութիւն և զսքանչելիս հայրապետաց տոհմից սրբոյն Գրիգորի Լուսաւորչին, և զտեսիլ և զկտակ սրբոյն Ներսէսի, և զքաջութիւն և զյաղթութիւն արիական ազգին Մամիկոնէից... եւ առդ վայս Բանեալ յԱրեւելից գրոց ի Հայոց մնացորդացն պատմութիւն...»¹⁶, Եթե Վարդան Մամիկոնյանի՝ Արշակունյաց ոստանին տիրակալութիւնն անելու փաստը հեղինակին հայտնի չլինէր որեւէ հնագույն աղբյուրից, հենց նրա մատնանշած «յԱրեւելից գրոց ի Հայոց մնացորդաց պատմութիւն»-ից, ապա ի՞նչ հիմք կա կարծելու, որ այն հնարել է ինքը՝ Մեսրոպայ Այստեղ էլ պատմիչի վկայութեան հավաստութիւնը կասկածի տակ առնելու որեւէ լուրջ հիմք չկա։

Հարկ ենք համարում նախկինում մեր օգտագործած տվյալների վրա ավելացնել նաև Վարդան պատմիչի վկայութիւնները, որոնք եթե անգամ որեւէ կարևոր նորութիւն չեն բերում, ապա գեթ յուրովի հաստատում են Թովմա Արծրունու և Մեսրոպ Վայոցձորցու վկայութիւնները։ Այսպես, անդրադառնալով Ավարայրին նախորդող տարիների իրադարձութիւններին, պատմիչը կարճառոտ գրում է. «Իսկ նախարարացն ի մի վայր ժողովեալ, կացուցանեն տեղապալման թագաւորութեան զսուրբ Վարդան։ Չայս ժամանակօք դարձան ի թարգմանութենէ Հեռոյ, Կորին և Արձան...»¹⁷, Հեղինակն այնուհետև շարունակում է. «...հնազանդեցան սրբոյն Վարդանայ ամենայն նախարարքն Հայոց, որովք տայր պատերազմ ընդ Պարսս զամս իննևտասն, յաղթեալ քառասուն և երկու պատերազմաց, մինչև ցկատարումն իւր մարտիրոսութեամբ...»¹⁸։ Հազիվ թե հնարավոր է ապացուցել, թե Վարդանի այս վկայութիւնները սոսկ հորինվածքներ են և չեն ծագում մեղ անհայտ որեւէ հնագույն աղբյուրից։

Քննարկված փաստերի լույսի տակ թվում է, թե նոր իմաստ է ստանում Եղիշեի հաղորդած մի տեղեկութիւնը։ Պատմիչը վկայում է, որ երբ Վասակ Սյունին դաժանում է ապստամբութեան ուխտին ու հեռանում՝ իր հետ տանելով մի շարք նախարարների, Վարդանը «հրաման տուեալ ամենայն ղօրացն ժողովել յԱրտաշատ քաղաք, փոխանակ յետս կացելոցն՝ որ ելին զհետ իշխանին Սիւնեաց, զեղբարս կամ գորդիս կամ զեղբարցն ուրիս ի տեղի նոցա մատուցանէր, և զիւրաքանչիւր զօրս տայր նոցա, զի գեռ ևս ինքն ունէր զամենայն աշխարհէն»¹⁹։ Պատմիչը, ինչպես տեսնում ենք, մատնանիշ է անում նաև Վարդանի լայն լիազորութիւնների ֆեոդալական իրավական հիմքը՝ իր մտքի շարունակութեան մեջ հատուկ շեշտելով Մամիկոնյան տան նահապետի՝ Արշակունիների ոստանին տիրակալելու հանգամանքը. «...քանզի ինքն իսկ բռնացնալ ունէր զքաղաքաւորացն տեղիսն միաբանութեամբ նախարարացն»²⁰, իրկորդական հանգամանք չէ, հարկավ, որ ավելի ուշ նույն կերպ էր բնութագրում Վարդան Մամիկոնյանի տիրական դիրքը Մեսրոպ Վայոցձորցին՝ դարձալ ընդգծելով Վարդանի՝ հայոց արքունի ոստանին տիրակալելու պարագան («...բռնացեալ ունէր զտեղի թագաւորացն Հայոց...»)։

Վերը շարադրածից միանգամայն աներկբա է եզրակացութիւնը. ստանալով նախարարների (հասկանալի է, խոսքը ապստամբութեանը հարած նախարարների մասին է) համաձայնութիւնն ու վստահութիւնը (ամիսբանութեամբ նախարարացն»), Վարդան Մամիկոնյանը ազատ ու ինքնակամ տնօ-

16 Մեսրոպ Վայոցձորցի. Պատմութիւն սրբոյն Ներսէսի Հայոց հայրապետի.— Սուրբ հայկական, հ. 2, Վենետիկ, 1853, էջ 138—139։

17 Հավաքումն պատմութեան Վարդանայ Վարդապետի. Վենետիկ, 1862, էջ 52—53։

18 Նույն տեղում, էջ 53։

19 Եղիշեի Վասն Վարդանայ և Հայոց պատերազմին. ի լոյս ածեալ բաղդատութեամբ ձեռագրաց աշխատութեամբ Ե. Տեր-Մինասեան. Երևան, 1957, էջ 99։

20 Նույն տեղում։

րինել է «եռ կաշածներին» կալվածքներն ու զորական ուժերը՝ դրանք տալով ապստամբության ուխտին դավաճանածների մերձավոր ազգականներին։ Այս հանգամանքը չափազանց կարևոր է մեզ հետաքրքրող հարցի մեկնաբանության առումով, որ մատնանիշ է անում Վարդանի իրավական լիազորությունների ընդարձակ շրջանակը։ Որքան մեղ հայտնի է, ֆեոդալական Հայաստանում նախարարական տների կալվածքների ու զորական ուժերի նկատմամբ նման իրավունքը (և այն էլ ոչ միշտ և ոչ ամբողջությամբ) վերապահված է եղել միայն լիազորված թագավորներին, բայց ոչ երբեք սպարապետներին։

Մտեփանոս Տարոնեցի Ասողիկի մի վկայությունը դիտել է տալիս, որ Վարդանի լիազորությունները տարածվել են անգամ կրոնական կյանքի հարցերի վրա. մասնավորապես այնպիսի հույժ կարևոր մի խնդրի, որպիսին էր երկրի հոգևոր առաջնորդի ընտրությունը։ Պատմիչը վկայում է. «...յետ մահուան Սուրմակայ ժողովեալ հայրապետացն Հայոց՝ խնդրեալ գտին քահանայ ռմն Յովսէփ անուն, որ լեալ էր աշակերտ Մեծին Մեսրոպայ, ի գաւառէն Վայոց ձորոյ ի զեղջէն Հողոցիմայ։ Եւ հրամանաւ Վարդանայ նստուցին յայսոս կաթողիկոսութեան, ամս Բ»²¹։

Այսպիսով, մատենագրական աղբյուրների տվյալների քննությունը հաստատում է այն իրողությունը, որ, եթե անգամ Վարդան Մամիկոնյանը դեռևս պաշտոնապես թագավոր չէր, չէր անցել թագադրման հետ կապված արարողությունները (Ավարայրին նախորդող բուռն իրադարձությունները հազիվ թե ընձեռնին այդ հնարավորությունը), այնուամենայնիվ ապստամբության ուխտին հավատարիմ մնացած նախարարների կամքով և ընտրությամբ նա կարգվել է «տեղապահ թագաւորութեան» (Վարդան վարդապետ)՝ ստանալով ամենալայն լիազորություններ՝ ինչը կարող էր ունենալ երկրի թագավորը. նա տիրակալել է Արշակունիների ոստանին՝ «Վարդան Մամիկոնեան բռնացեալ ունէր զտեղի թագաւորացն Հայոց» (Մեսրոպ), նրան է վստահվել Հայաստանի տանուտերությունը՝ զվերակացութիւն Հայոց» (Թովմա), նրա ձեռքին է գտնվել հայոց երկրի քաղաքական իշխանության ղեկը՝ «ինքն ունէր զամենայն աշխարհն» (Նղիշ)։

Չնայած քաղաքական կյանքի ձախորդ հանգամանքներին, ինչպես երևում է, հայոց ինքնուրույն պետականության, ազգային թագավորության վերականգնման գաղափարը (անկախ նրա իրականացման կարելիությունից) բավական զորեղ է եղել V դարում (փակագծում ասենք, որ այն երբեք չի բաժանվել հայից՝ ընդհուպ մինչև XX դարը)։ Այդ գաղափարի իրականացման երազանքը բնորոշ է եղել դարի հեռատես գործիչներին, նշանավոր մտածողներին։ Բավական է հիշել Խորենացու «Հայոց պատմությունը», որ ամբողջովին ներթափանցված է հայոց թագավորությունը վերականգնված տեսնելու երազանքով ու հույսով։ Կարծում ենք նաև ավելորդ չի լինի վերհիշել Ղազար Փարպեցու «Հայոց պատմության» երրորդ դրվագի այն հատվածը, ուր պատմվում է Վահան Մամիկոնյանի մարզպան կարգվելու մասին։ Հատկանշական է, որ բաժանելով համընդհանուր ցնծությունը, Հովհան Մանդակունի կաթողիկոսը սաղմոսել է տալիս Աստվածաշնչի Թագավորության գրքից այն տեղը, ուր խոսվում է Դավթի՝ իր Սողոմոն որդուն թագավորեցնելու մասին. «Եւ սրբոյ կաթողիկոսին Հայոց Յովհաննու տեսեալ զանկարծելի աւետարտութիւնն (խոսքը պարսից արքայի՝ Վահանին մարզպան կարգելու հրովարտակի մասին է—Վ. Ն.), շնորհեալ յԱստուծոյ ի ժամանակս երանելոյն, բերկրեալ ցնծալից սրտի՝ տայր սաղմոսել ի ժամուն. «Յեկեղեցիս օրհնեցէք զԱստուած, և զՏէր յաղբերացն Իսրայէլի». և կարգացմունս հրամայէր՝ զտեղի ելիցն Իսրայէլի ի ծառայութենէն Փարաւովնի, և ի Թագաւորութենէն՝ զընթերցուածն՝ ուր թագա-

21 Ստեփանոս Տարոնեցույ Ասողիկն Պատմութիւն տիեզերական. Ս. Պետերբուրգ, 1885, էջ 78։ Ակամա հիշում են Արշակ II-ի հրամանով Ներսեսին կաթողիկոս կարգելը։

ւորեցոյց Դաւիթ Ղորղին իւր զՍողոմոն²²։ Փաստը, իհարկեւ, սիմվոլիկ բնույթ ունի, բայց միաժամանակ այստեղ չի կարելի չնշարել ժամանակին բնորոշ մտայնութեան յուրովի գրական անդրադարձումը։

Այժմ հարց է ծագում. ինչո՞վ բացատրել այն հանգամանքը, որ հայ նախարարները, որոնք, ինչպես հայտնի է, դրանից ընդամենը երկու տասնամյակ առաջ փոքր դեր չէին կատարել Արշակունյաց հարստութեան վերացման գործում, Ավարայրի նախօրյակին փոխեցին իրենց դիրքը և անգամ նախաձեռնեցին հայկական թագը վերականգնելու գործը։

Հարցի պատասխանն, անշուշտ, պիտի որոնե՛լ V դարի 40-ական թթ. (թերեւս ավելի ստույգ՝ այդ թվականների երկրորդ կեսին) Հազկերտ II-ի նոր միջոցառումների հետեւանքով Հայաստանում ստեղծված բարդ իրավիճակի մեջ։ Հենվելով սկզբնաղբյուրների տվյալների վրա և օգտագործելով հայ պատմական գիտության, մասնավորապես ակադեմիկոս Հ. Մանանդյանի հետազոտությունների արդյունքները, մենք այդ հարցին անդրադարձել ենք Վարդանանց պատերազմի սոցիալ-քաղաքական պատճառների լուսաբանության ընդհանուր ասպեկտով²³։ Այստեղ միայն համառոտ կխոսենք այն էական հանգամանքների մասին, որոնք հարկադրեցին հայ ազնվականությանը փոխել դիրքորոշումը։

Հայտնի իրողություն է, որ վերացնելով Արշակունյաց հարստությունը, պարսից արքունիքն սկզբում ձեռք չտվեց հայ նախարարների ժառանգական իրավունքներին ու արտոնություններին, որի շնորհիվ հայերին հաջողվեց Հայաստանի՝ պարսից գերիշխանության տակ անցած մասում առայժմ, իրոք, ապահովել ներքին ինքնավարությունը։ Այդ է հաստատում, ինչպես նկատվել է, Նղիշենի մի կարևոր վկայությունը. «Եւ իբրեւ զնա (հայոց Արտաշես թագավորին—Վ. Ն.) ևս մերժեաց ի թագաւորութենէն, ի նախարարսն Հայոց անկանէր թագաւորութիւնն. զի թէպէտ և գանձն յարքունիս Պարսկաց երթայր, սակայն այրուծին Հայոց բովանդակ ի ձեռն նախարարացն առաջնորդէր ի պատերազմի»²⁴։

Բայց այդ վիճակը երկար չշարունակվեց։ Հազկերտ II-ը շուտով փոխում է քաղաքականությունը, մի շարք նոր միջոցներ է ձեռնարկում, որի առթիվ արժեքավոր տեղեկություններ է տալիս Նղիշեն²⁵։ Պարսից արքունիքը գործը հետևողականորեն առաջ է տանում վաղօրոք խնամքով մշակված ծրագրով։ Նախ երկրից դուրս է բերվում փառաբանված հայոց այրուծին՝ հայկական բանակի գլխավոր ուժը, և վասալ մյուս երկրների զորաբանակների հետ («որոց ոչ էին օրէնք երթալ զայն ճանապարհ յառաջ ժամանակաւ», ինչպես ասում է Նղիշեն) ուղարկվում հեռավոր երկրներ՝ քուշանների դեմ պատերազմելու։ Հայտնի է, որ հայոց այրուծիի ծանրությունն ս՛մբողջովին ընկած էր նախա-

²² Ղազարայ ֓արպեցւոյ Պատմութիւն Հայոց եւ Թուրք առ Վահան Մամիկոնեան. աշխատութեամբ Գ. Տէր-Մկրտչյան և Ստ. Մալխասյանց. Տփղիս, 1904, էջ 175։

²³ Տե՛ս մեր «Հայերի կողմից պարսկական տիրապետութեան դեմ օւղղված 451 թվի ապստամբութեան սոցիալ-քաղաքական պատճառների հարցի շուրջը».—ՀՄՍՈՒ ԳԱ «Տեղեկագիր» (հաս. գիտ.), 1951, № 10։

²⁴ Ն Ղ ի շ Ե, էջ 6։ Ուշադրութեան արժանի է, ի դեպ, որ բերված տողերի անմիջական շարունակության մեջ պատմիչը հարկ է համարել շեշտել. «Վասն որոյ և աստուածապաշտութիւնն րարծրագլուխ կամակարութեամբ երեւել լինէր յաշխարհին Հայոց, ի սկզբան տէրութեանն Շապուհոյ արքայից արքայի մինչև յամն երկրորդ Յազկերտի արքայից արքայի՝ որոյն Վառմայ, զոր եգիտ սատանայ իւր գործակից...» (նույն տեղում)։ Պատմիչի այս տողերը կարծես են տալիս, որ նրան օտար չի եղել այն մտայնությունը, թե հավատի հարցը, որքան էլ այն մեծ կարևորություն ունենար, այնուամենայնիվ ինքնակա հարց չէր, որոշ իմաստով ենթակաւ։ չկան էր քաղաքականին։

²⁵ Այս մասին մանրամասն տե՛ս վերը հիշված մեր հոդվածը (ՀՄՍՈՒ ԳԱ «Տեղեկագիր», 1951, № 10, էջ 95 և հտ.)։ Աղբյուրների համապատասխան վկայությունները մեշ է բերել նաեւ Կ. Յուզրաշյանը։

ուարենքի վրա, այն զինվում և պահվում էր նախարարների ժախքով: Պատմիչը չի մոռանում հիշատակել, որ հայոց այրուձին կազմված էր «ազատներից», «ազատորդիներից» և «լարբունի տանէն զոստանիկս», որ, հարկավ, երկրորդական հանգամանք չէր: Այրուձիի դուրսբերումով երկրի ռազմական ներքին հղորությունը թուլացնելուց հետո, Հազկերտ II-ը ձեռք է բարձրացնում հայ նախարարների ավատական-ժառանգական արտոնությունների վրա՝ կիրառելով չափազանց նենգ ու խարդախ միջոցներ, որոնց նպատակն էր այդ արտոնությունների սահմանափակումը և այնուհետև՝ դրանց վերացումը, նախարարությունների տկարացումը, նախարարական դասի բարոյական ալլասերումը, նրա՝ առանց այն էլ թույլ միասնության քայքայումը և, հնարավոր է՝ փաստորեն երկրի իշխող միակ քաղաքական ուժի ոչնչացումը²⁶: Պարսից արքունիքը այդ միջոցներով ձգտում էր հայ նախարարությունների նկատմամբ սահմանել նույն կարգն ու վերաբերմունքը, ինչ որ զուրկություն ունեւր Պարսկաստանի մյուս մարզերում՝ Հայաստանը դիտելով որպէս իր ընդարձակ տերութեան սովորական մի մարզ: Միանգամայն հնարավոր է թվում Մանանդյանի եզրահանգումը. «ինչպէս հայտնի է, Սասանյան Պարսկաստանում, — գրել է նա, — որի սոցիալական ու տնտեսական հատուկ կարգերն ու կառուցվածքը նման ու համապատասխան էին ֆեոդալական Հայաստանի ներքին կազմակերպության, խիստ զորեղ էր պետութեան կենտրոնացումը: Թագավորական իշխանությունն այստեղ տնօրէնէն էր ամբողջ երկրի և իրական տերը ու հրամայողը ֆեոդալ իշխանավորների: Իբրև ֆեոդալական զորեղ միապետություն՝ Պարսկաստանը, բնականաբար ձգտում էր այժմ սահմանափակել նախարարական իշխանությունների ինքնուրույնությունը և ենթարկել նրանց թագավորական գահի անմիջական ազդեցությանը»²⁷:

Հազկերտ II-ի հրամանով վերացվում են արքունի կարևոր պաշտոնների՝ «գործակալությունների», ինչպէս նաև ըստ էութեան՝ նախարարական տոհմների նահապետների ժառանգականութեան իրավունքները, խախտվում է «Գահնամակով» սահմանված կարգը և այլն: Նախարարությունների նկատմամբ պարսից արքունիքի վարած նենգ քաղաքականութեան մասին գաղափար են տալիս Նդիշեի պերճախոս վկայությունները: Ըստ Նդիշեի Հազկերտը «...սկսաւ անուհետև յառաջ կոչել զկրսներս յաւագաց և զանարգս ի պատուականաց և զտգէտս ի գիտնոց և զանարիս ի քաջ արանց. և զի՞ մի մի թուիցեմ, այլ զամենաւն զանարժանս յառաջ մատուցանէր և զամենայն զարժանաւորսն յետս տանէր. մինչև զհայր և զորդի քակէր ի միմեանց»²⁸:

Չափազանց ուշադրավ են Նդիշեի հաղորդած այն տվյալները, որոնք վերաբերում են պարսից արքունիքի՝ հայ իշխանական դասի բարոյական ալլասերման ուղղությամբ կիրառած միջոցներին: «Պատրէր (Հազկերտ II-ը) զոմանս ի նոցանէ (հայ նախարարներից—Վ. Ն.) ոսկւով և արծաթով, և զբազումս ալլով եւս առատ պարգևօք. իսկ զոմանս ազարակօք և մեծամեծ գեղօք, դոմանս պատուովք և իշխանութեամբք մեծամեծօք»²⁹: Դենշապուհի աշխարհագրի հետևանքների մասին խոսելիս պատմիչը հաղորդում է. «...զնախարարեանն բանսարկութեամբ արկ ընդ միմեանս, և յամենայն տան արար խոռվութիւն»³⁰: Խոսելով քուշանների դեմ ուղարկված հայոց այրուձիի կրած զրկանք-

26 Հազկերտ II-ի ձեռնարկած այդ նոր միջոցների հիմնավոր մեկնաբանությունը տվել է ակադեմիկոս Հ. Մանանդյանը իր «Ֆեոդալիզմը հին Հայաստանում» մենագրութեան մեջ (Երևան, 1934):

27 Հ. Մանանդյան. Ֆեոդալիզմը հին Հայաստանում, էջ 287—288:

28 Նդիշե, էջ 16:

29 Նույն տեղում, էջ 17:

30 Նույն տեղում, էջ 23: Այստեղ մեր նպատակից դուրս ենք համարում Դենշապուհի աշխարհագրի մյուս ծանր հետևանքների մասին խոսելը, որ վերաբերում են եկեղեցու և հողերի դասի ապահարկության իրավունքի վերացմանը, երկրի վրա դրված հարկերի ժանրացմանն ու հարկապահանջության անօրինական ձևերին, հազարապետի (որ «իբրև զհայր վերակացու համա-

ների մասին, նշված շարունակում է. «Բազում և այլ ևս յանարժան հարուածս արարէին, զոր և ոչ ընդ գրով իսկ արժանի համարեցաք արկանել: Եւ զոմանս ի նոցանէ ճեռացուցին և քաղցեցին յազնուական պատուոյն անարգեալ»³¹: Հեն-վելով այս տեղեկության վրա՝ ակադ. Հ. Մանանդյանը կարծում է, որ Հագ-կերտ II-ը անգամ իրեն իրավունք է վերապահել հայ ազնվականներին ղեկել ազնվական պատվից:

Պիտի կարծել, որ իրականում հիմնականում այս հանգամանքներն են պայմանավորել հայ նախարարությունների դիրքափոխությունը Ավարայրի նախօրեին ինքնուրույն թագավորական կարգի նկատմամբ: Փութացնելով Արշակունյաց հարստության վերացումը, հայ նախարարներն, ըստ երևույթին, այն հույսն էին փայփայում, թե վասալական կախումը հեռավոր Տիգրանում նստած պարսից արքայից իրենց կազատի Արշակունի թագավորների կաշկանդումնե-րից և թերևս ավելի կընդարձակվեն իրենց դասային արտոնությունները: Բայց դաժան իրականությունը կարճ ժամանակամիջոցում հակառակն ապացուցեց. ոչ միայն չպանպանվեց դաբեբով ավանդաբար ձեռք բերվածը, այլև կորսվեց նդածը:

Գուցե և հնարավոր կլինե՞ր մտածել, թե հայ նախարարների նկրտումները կարող էին սահմանափակվել նախկին արտոնություններն ու ժառանգական իրավունքները վերստանալու և ինքնավարության պահպանման ձգտումով: Ինչ-պես կարծում է Կ. Յուզբաշյանը: Բայց օրինական հարց է ծագում, թե Ավա-րայրին նախորդող իրադրությունը բավական չէ՞ր նախարարներին համոզելու, որ պարսից գերիշխանության պայմաններում ինքնավարությունը հաստատուն լինել չի կարող, և, իսկապես ի՞նչ երաշխիքներ կային նրա տևական գոյության համար: Թվում է, թե այստեղ, ինչպես ասվում է, կոմենտարներն ավելորդ են:

Փաստերից բացի պատմական տրամաբանությունն էլ հարկադրում է մտա-ծել, որ հայ նախարարությունները, համենայն դեպս Վարդանի գլխավորած ապստամբությանը հարող նախարարները, իհարկե, ավելի բանական և շահե-կան պիտի համարեին հակվելու ինքնուրույն թագավորությունը վերականգնե-լու մտքին և, ինչպես ցույց տվեց մատենագրական տվյալների քննությունը, իրականում հենց այդպես էլ եղել է: Ինքնուրույն ազգային պետականության վերականգնման գաղափարը միանգամայն համապատասխանում էր և՛ երկրի իշխող աշխարհիկ վերնախավի, և՛ եկեղեցու ու հոգևորականության, և՛ հայ հասարակության մյուս շերտերի, ամբողջությամբ վերցրած՝ ողջ հայ ժողովրդի քաղաքական շահերին: Ստեղծված իրադրության պայմաններում, կրկնում ենք՝ անկախ գաղափարի իրականացման հնարավորությունից. դա էր փրկու-թյան առավել հաստատուն ճանապարհը:

Սույն հոգվածում մենք հիմնականում վերլուծեցինք մատենագրական աղ-բյուրների այն տվյալները, որ տարիներ առաջ մեզ հիմք էին տվել առաջադ-րելու, և այժմ էլ իրավունք են տալիս նույն համոզմունքով պնդելու Ավարայրի ճակատամարտի նախօրեին ու Վարդանանց պատերազմի ընթացքում հայկա-կան ինքնուրույն թագավորությունը վերականգնելու հարցը դրված լինելու տե-սակետը:

Ավելորդ չենք համարում նշել, որ մեր առաջ քաշած վարկածը ժամանա-կին ընդունվեց այնպիսի մի հմուտ և խստապահանջ պատմաբանի կողմից, որ-պիսին էր ակադեմիկոս Աշոտ Հովհաննիսյանը³²: Նշանավոր պատմաբանը, սա-կայն, ավելի հեռուն գնաց, ավելի լայն հայեցակետով դրեց հարցը՝ ինքնու-րույն հայկական թագավորության վերականգնման խնդիրը մեկնաբանելով ոչ միայն V դարի, այլև հաջորդ հարյուրամյակների հայ ազատագրական կռիվ-

րեալ էր աշխարհականաց քրիստոնէիցս) պաշտոնը հայերից խելուն և պարսիկներին հանձնելուն. մոգպետին զդատաւոր աշխարհին» կարգելուն և այլն, որոնք մեծապես բորբոքեցին ժողովրդի ապստամբական տրամադրությունները:

³¹ Նույն տեղում, էջ 20—21:

³² Տե՛ս նրա նշված աշխատությունը, էջ 97—99:

ների ընդհանուր ասպեկտով՝ աղերսելով այն հին Հայաստանի նախարարական կառուցվածքի առավել կարևոր առանձնահատկություններին³³, «Հիմք կա կարծելու, — նշել է նա, — թե Արշակունյաց ժառանգության համար իրենց պատյաններից պատրաստվում էին սուր հանել ոչ միայն Սյունյաց, այլև Մամիկոնյան, Արծրունյաց և Բագրատունյաց տների նախարարները»։ Շարունակելով իր միտքը, Աշոտ Հովհաննիսյանը գրել է. «Վերջերս հրապարակվեց Վ. Նալբանդյանի մի հոդվածը (հեղինակը նկատի ունի մեր՝ «451 թ. ազատագրական շարժման հետ կապված մի հարցի շուրջը» հոդվածը — Վ. Ն.), որը դիտել է տալիս, թե Հայաստանի պատմությունը քաղաքական այս առանցքի շուրջն էր դառնում արդեն իսկ V դարի կեսերին, այսպես կոչված Վարդանանց պատերազմի նախօրեին և այդ պատերազմի ժամանակ»³⁴։ Միանգամայն հիմնավոր է թվում Աշոտ Հովհաննիսյանի այն եզրահանգումը, թե՛ «Արշակունի թագավորների ժառանգներ լինելու հավակնություն ունեցող հայ նախարարները հաջորդ դարերում պայքարում էին Հայաստանի ազատագրման համար Արշակունյաց թագավորությունը վերականգնելու նշանաբանի տակ»³⁵։

Կասկած չի հարուցում այն, որ ապստամբության ուխտին անվերապահ հարած նախարարների կողմից «տեղապահ թագաւորութեան» ընտրված Վարդան Մամիկոնյանի՝ հայոց թագավորությունը վերականգնելու ազգանվեր ջանքերը չեն մնացել թուլություն պիտի գտնեին ոչ միայն երկրի ավագանու, եկեղեցու և գործի կողմից, այլև օտարի գերիշխանության տակ ընկած, նրա քաղաքական. սոցիալ-տնտեսական լուծը կրող, անագորույն կրոնական հալածանքներին ճնշակա ժողովրդի ամենալայն զանգվածների շրջանում։

Մեր հարցադրումից, ի դեպ, որոշ բան պարզվում է նաև Մամիկոնյանների և մյուս հայ ազդեցիկ նախարարական տների բարդ փոխհարաբերությունների մասին։ Այստեղ մեզ հետաքրքրողը, մասնավորապես, Վարդան — Վասակ փոխհարաբերությունն է և ապստամբության վճռական պահին Սյունյաց իշխանի քաղաքական դիրքի հիմնական սոցիալ-հոգեբանական դրդապատճառի հարցը³⁶։ Անհերքելի փաստ է, որ ազատագրական ապստամբության վճռական պահին, երբ հաջողության հասնելու համար այնքա՛ն անհրաժեշտ էր ուժերի միասնությունը, Վասակը լքեց ապստամբներին, ջլատեց ուժերն ու անցավ պարսիկների կողմը՝ իր հետ տանելով մի քանի նախարարներ։ Փառասեր ու իշխանատենչ Վասակը, որ երկրի մարզպանն էր, պարսիկների կողմից կարգված ամենաբարձր պաշտոնյան և, ըստ երևույթին, ավելի շատ հավակնություն կարող էր ունենալ հայոց թագավոր դառնալու, գրգռվելով նախարարների վերաբերմունքից (Վարդանին նախընտրելու), դավաճանության ուղին բռնեց՝ հնչյա ունենալով այդ գնով հայոց թագն ստանալ Հազկերտ II-ի

³³ Տե՛ս նույն տեղում, էջ 99 և հտ.։

³⁴ Նույն տեղում, էջ 97։

³⁵ Նույն տեղում, էջ 99։ Նկատենք, ի դեպ, որ V դարի ապստամբության անցքերը քննելիս պրկվում ենք մտքին է հանգել բազմավաստակ հայագետ Լեոն։ Տե՛ս նրա նշված աշխատությունը, էջ 53։

³⁶ Դրականում, ի՞նչպե՛ս, շատ բարդ ու հակասական է եղել Վասակ Սյունու և՛ մարդկային նկարագիրը, և՛ նրա քաղաքական վարքագիծը ու մենք բնավ մտադիր չենք արհեստական կերպով դուրացնելու։ Հարցը։ Սյունյաց իշխանի քաղաքական վարքագծի մասին բավական գրվել ու խոսվել է և այժմ էլ, մեր օրերում ժամանակ առ ժամանակ մամուլի էջերում այն բանավեճի առի՛թ է դառնում՝ երբեմն ասպարեզ հանելով դուրազայթ ու թեթևաբաշ հարցադրումներ, որոնց նպատակը հիմնականում Վարդանանց պատերազմի ժամանակ Վասակի վարած քաղաքականությունը դիվանագիտական առումով ավելի շրջահայաց և զգուշավոր ներկայացնելու բացահայտ միտքն է։ Այստեղ մենք նպատակ չունենք մանրամասն անդրադառնալ այդ հարցին և տալ Վասակի վարած քաղաքականության բնութագիրը. այդ մենք արել ենք մեր «Վարդանանց պատերազմը և Գ. Գեմիկոնյանի «Վարդանանց» պատմավեպը» մենագրության մեջ։ Այժմ էլ պաշտպանում ենք մեր կարծիքը, թեև կարելի էր անել որոշ խմբագրական շտկումներ ու հավելումներ։

ձեռքից (կամ, ամենաքիչը՝ պահպանել մարզպանական պաշտոնը)։ Այս առթիվ արդեն առատ տեղեկություններ են հաղորդում Եղիշեն և Փարպեցին։ Հիշենք թեկուզ Վասակի անփառունակ վախճանի նկարագրությունը Եղիշեի մատնից, որ պատմիչը ավարտում է հետևյալ հատվածով. «Եւ այն որ կամէր թագաւոր լինել մեղօք Հայոց աշխարհին, ոչ երեւցաւ տեղի գերեզմանի նորա. քանզի իբրեւ զշուն մեռաւ և իբրեւ զէշ քարշեցաւ։ Ոչ յիշեցաւ անուն նորա ի մէջ սրբոց, և ոչ մատեաւ յիշատակ նորա առաջի սուրբ սեղանոյն յեկեղեցւոյն։ Ոչ ինչ եթող չարիս՝ զոր ոչ գործեաց ի կեանս իւր, և ոչ ինչ մնաց ի մեծամեծ չարեաց՝ որ ոչ անցին ընդ նա ի մահուան նորա։ Գրեցաւ յիշատակարանս այս վասն նորա, առ ի կշտամբումն յանդիմանութեան մեղաց նորա. զի ամենայն՝ որ զայս լուեալ գիտասցէ, նզովս ի հետ արկցէ, և մի՛ լիցի ցանկացող գործոց նորաս»³⁷։

Սույն հոդվածում բանավեճի առարկա խնդրի առթիվ բնականաբար մի հարց է ծագում. ինչո՞ւ մեր V դարի պատմիչները՝ Եղիշեն ու Փարպեցին ուղղակի վկայություններ չեն թողել Վարդան Մամիկոնյանի միջոցով հայոց գահը վերականգնելու առթիվ։ Ժամանակին մենք այդ հարցը երկու կերպ են բացատրել³⁸։ Նախ՝ մեր հին պատմիչները որոշակի մի ձգտում են ունեցել՝ Վարդանանց ապստամբությունը ներկայացնել որպես սոսկ քրիստոնեական կրոնի համար մղվող պատերազմ, իսկ իրեն՝ Վարդանին և իր զինակիցներին՝ իբրեւ հավատի համար նահատակված վկաներ և այս պատճառով էլ, հավանաբար, Վարդանի կրոնական փառքին չեն ուզեցել որևէ «աշխարհիկ կենաց» տարր խառնել։ Այն դարում մեր պատմիչների այսօրինակ միտումն ու մտայնությունը միանգամայն բնական պիտի համարել։ Կարելի է բազմաթիվ օրինակներ բերել, երբ մեր հին պատմիչները (Իհարկե, ոչ միայն Եղիշեն ու Փարպեցին) պատմության հայտնի դեպքերը ձգտել են մեկնաբանել լոկ քրիստոնեական կրոնի ու հայ եկեղեցու շահերի դիտակետից, հանգամանք, որ, ինչպես հայտնի է, շատ դեպքերում հանգեցրել է պատմական եղելությունների միակողմանի մեկնաբանության³⁹։ Հնարավոր ենք համարել նաև մեկ այլ ենթադրություն. որ մեր հին պատմիչների՝ Եղիշեի ու Փարպեցու երկերում իրոք արձանագրված լինի փաստը, որ հետո դուրս է գցվել գրիչ-խմբագիրների ձեռքով։ Ժամանակին մեր ա՛յս ենթադրություններն էլ ընդունվել են Աշոտ Հովհաննիսյանի կողմից։ «Այս ամենից դժվար չէ հանգել այն եզրակացության, — գրել է հետադուտողը, — թե Վարդանանց պատերազմի ժամանակ Մամիկոնյան և Սյունյաց նախարարական տների բախումը տեղի ունեւ մասամբ հենց Արշակունյաց քաղաքական ժառանգության շուրջը, հանգամանք, որ մեզ հասած հնագույն պատմական աղբյուրների մեջ դիտավորյալ մթարկվել է կամ դուրս է ձգվել հետագա գրիչների ձեռքով՝ նպատակ ունենալով վեր հանել սոսկ անցքերի կրոնա-բարոյական կողմը կամ ներկայացնել Վարդանին և յուրայիններին միայն որպես կրոնի և եկեղեցու համար նահատակված վկաներ»⁴⁰։

Ավարտելով մեր խոսքը, կցանկանայինք ասել, որ բանավեճի առարկա խնդիրը, թերևս լրացուցիչ ուսումնասիրությունների և հիմնավորման կարիք ունի, և գուցե դրանով առաջիկայում զբաղվեն պատմաբանները, բայց բոլոր դեպքերում հագիվ թե խոհեմ բան նկատվի մեր առաջադրած տեսակետը այդպես դյուրութամբ, առանց ապացույցների բերելու «մերժելի» հայտարարելն ու դրանով հարցը փակելը։

³⁷ Եղիշե, էջ 140։

³⁸ Տե՛ս շՄՄԻ ԳԱ «Տեղեկագիր» (հաս. գիտ.), 1953, № 12, էջ 72—73։

³⁹ Արդյո՞ք այդ նույն մտայնությամբ չեն առաջնորդվել Մխիթարյան միաբանության հայրերը՝ Մեսրոպ Վայոցձորցու «Պատմությունը» հրատարակելիս նրա հիշատակարանից դուրս բողնելով Վարդան Մամիկոնյանի՝ Արշակունիների ոստանին տիրակալություն բանելու փաստը, որը, ինչպես տեսանք, սերտորեն առնչվում է հայոց թագավորական իշխանության վերադարձնման հարցի հետ։

⁴⁰ Աշոտ Հովհաննիսյան. նշվ. աշխ., էջ 99։

ВОПРОС ВОССТАНОВЛЕНИЯ АРМЯНСКОГО ЦАРСТВА В ПЕРИОД ВОИНЫ ВАРДАНИДОВ

Член-корр. АН АрмССР В. С. НАЛБАНДЯН

Резюме

Критическое рассмотрение армянских исторических первоисточников (Товма Арцруни, Месроп Вайоцдзорци, Вардан Вардапет) подтверждает, что в ходе подготовки и в период восстания армян против персидского владычества был поставлен вопрос о восстановлении армянской государственности—самостоятельного Армянского царства, вместо упраздненной в 428 г. династии Аршакидов. На армянский трон нахарары (князья) выдвинули кандидатуру руководителя освободительной войны, спарапета (военачальника армянских войск), видного государственного деятеля Вардана Мамиконяна.